

續資治通鑑長編卷八十

宋 李燾 撰

眞宗

大中祥符六年春正月癸巳朔御朝元殿受朝

丙申高州蠻人來貢

庚子詔自今凡更定刑名邊防軍旅茶鹽酒稅等事並令中書樞密院參詳施行以上封者言二府命令互出或有差異故也 令審刑院大理寺三司詳定配隸法既而取犯茶鹽礬麴私鑄錢造軍器市外蕃香藥挾銅錢誘漢口出界主吏盜貨官物夜聚爲妖等十二條悉減從輕焉 詔如聞入內內侍省遣親事卒於京城察事因緣騷擾並止絕之

辛丑詔益利兩路去秋災歉宜令本路轉運使洎長吏
倍加存撫 倚閣廬壽和泗州所逋去年秋稅以水災
故也

乙巳夔州徼外蠻覃如綰等八十三人來貢 詔諸路
州軍所須繁碎物以正稅折納者自今悉罷之 兩浙
轉運使陳堯佐言杭潤等州米斛錢六十蓋淮泗不稔
行商販鬻致有增價乞行禁止詔不許仍令發廩賤糶
以濟貧民

丙午詔使臣犯入已贓徒已上罪敘用已至本職降兩
資者止犯入已贓杖罪及元斷徒以上該恩特停官者
敘用至元職降一等止縱逢赦命不得敘進又詔援赦
理選人如曾犯贓及酷刑害命者令流內銓責其再犯

當永不敘用知委狀先是太宗時貶黜再用人皆責改過狀以示儆戒於是申明之

丁未中書言命官犯罪配諸州衙前者承前經赦止放從便昨赦恩內許令敘理今請以贓重及情理蠹害者授諸州參軍餘授判司京朝官幕職令錄簿尉等第甄敘從之

戊申詔內臣將命于外干預州縣公事及所在官吏不卽以聞並寘于罪凡內臣出使皆責知委狀敢妄奏他事者當伏軍令祖宗舊制也

責軍令狀見江休復雜志今附此

又詔

如聞入內侍省遣親事卒於京城采察公事因緣騷擾並止絕之

己酉詔京城賜酺五日

知舒州蘇國華言部內官吏

僧道耆老二千二百七十三人詣州列狀請車駕謁靈仙觀詔諭止之

庚戌諸州勝境曾賜先朝御製書者並降上所作太宗聖文神筆頌刻石

辛亥進封衛國長公主爲徐國楚國爲邠國越國爲宿國詔仙官仙經之號有犯聖祖名者咸改之命中使葺唐州淮瀆廟

甲寅上謂宰臣曰羣臣出任受命之後多以南北非便爲訴向敏中曰國家任人豈容自便當須釐革上曰若所任非所便則其心不安心旣不安則何以久于其事王旦曰俯從人欲實由聖慈中外素知未可遽改也上然之

丁巳以監察御史唐肅爲梓州路提點刑獄先是肅爲
泰州司理參軍有商人夜宿逆旅而同宿者殺人亡去
旦起視之血汚其衣爲吏所執不能明遂自誣服肅爲
白其冤而知州事馬知節趣令具獄肅固持不可後數
日果得真殺人者于是郡牧判官缺或請以肅爲之上
曰朕方別有所委俄授此任肅錢塘人也

庚申置淑儀淑容順儀順容婉儀婉容並從一品在昭
儀上又置司宮令正四品在尙宮上著于令以婕妤楊
氏爲婉儀 詔兩浙諸州軍寺觀及民家藏銅像限兩
月內陳首委本處依銅鐘磬例勒知州通判名銜給令
依舊供養先是知衢州宋爲善言所部民有銅像者依
法區斷其銅像準犯銅例沒官慮傷崇奉之道而陷刑

者眾故條約之宋爲善未見

辛酉詔宗正寺以皇屬籍爲皇宋玉牒從判寺趙世長

之請也仍錄別本藏秘閣備檢討趙世長未見榮王元儼

嘗侍宴頗多言又嘗請石保吉伶人新隸教坊者作戲

及赴北園御筵有伶人少不中意元儼遽叱之將加捶

撻宮僚皆莫敢諫既而對上復請此伶人作戲上不悅

他日以語王旦等曰朕昔與諸王侍宴何敢如此弟兄

相接亦無游談唯是讀書著文交相質問卽位以來每

歲賜宴不過再三政慮燕喜之次言辭或致差失耳王

旦曰今當召記室崔昉諭以親王喜怒過當必須規正

向敏中曰陛下友愛親賢小或不當必以禮約之誠漸

磨之深旨旦曰聞王罕與賓屬相見上曰朕在東宮常

與官僚欵接楊勵邢昺日夕講誦今當儆戒之也

寶訓係此

事于祥符五年初無時月今附見皇宋玉牒後稍刪潤之

邵州闕守臣轉運司遣

潭州監稅聞人若拙權領州事上以若拙頃與李炎等謀叛因告變授官遽使親民俗何由勸罷之用澧州駐泊都監史方知邵州上封者言武臣知州軍處或闕通判望令轉運司飛奏以聞付有司速差所差官未到仍於京朝官知州通判有全員處權差從之

二月癸亥朔詔廣南福建川峽路軍民凶惡爲患者並依法斷訖并家屬械送赴闕川峽四路贓錢賞罰錢許以鐵錢十當一令開封府自四月至八月死亡者不須覆檢它月仍舊賜太常博士中書堂後官劉思恕等緡錢羊酒令賜酺日飲會時思恕等引樞密院副

承旨已下至大理寺法直官例請預酺宴王旦以爲不可故特有是命 向敏中陳堯叟馬知節丁謂等言自今聖製歌詩望各賜一本從之先是每賜惟及班首故敏中等有是請

甲子詔自今犯罪已敘用未復資人遇赦情輕者便與敘用

丙寅召宗室近臣詣滋福殿觀聖祖臨降及眾真列侍圖又陳於含光殿以示百官

戊辰上御乾元樓觀酺自是凡五日

辛未夔州蠻彭延進等四十八人來貢

甲戌詔文武官犯私罪該赦敘理者刑部磨勘訖中書樞密院具所犯輕重取旨 詔獎知河南府馮拯等獄

空故也 前泉州觀察推官公孫簡監茶場代還引對
便殿上閱其所試判辭荒謬止命加階簡自陳有勞乞
改京秩上令以判辭示之左右揮使退簡聲色愈厲詔
付御史鞫問責授房州文學

乙亥泰州言海陵縣陂湖草中生聖米頗濟饑民

乙酉詔自今諸寺院童行令所在官吏試經業責主首
僧保明行止乃得剃度如百屬試驗不公及主首保明
失實者並寘重罪先是歲放童行剃度皆游惰不逞之
民靡習經戒至有爲寇盜犯刑者甚眾故條約之

辛卯環慶副部署眞定王守斌言準詔簡省戍卒其自
京新發兵已令於水興軍等處屯泊上曰邊防利害係
將帥能否守斌能體朝旨減邊費亦可嘉也

三月壬辰朔宜春郡主高氏言蒙恩賜城西蔬圃望蠲其常租上曰租稅所以備軍須免之則後援例者眾不許

丁酉詔應祠祭行事並須早入致齋先是饗先蠶太祝馮經爲監祭使所糾故申明之河北轉運使右諫議大夫盧炎被疾炎勤於使職所至以幹集聞詔遣中使挾太醫往視及卒上甚悼之時炎母八十餘無恙有詔炎子太常博士士宗特追出命知懷州次子秘書丞士倫爲太常博士賦祿終喪

己亥閣門奏後苑賞花曲宴羣臣有禮容懈惰者上曰飲之酒而責其盡禮亦人所難也宜且降詔戒諭之龍圖閣待制張知白以疾固請補外甲辰命知青州

上作內侍箴賜閣承翰等承翰表請刻石本省從之
丁未詔沙門島罪人除該赦遣赴闕外自餘量其所犯
輕者徙置近地詔京城徼巡宜參用馬步軍士時巡
卒三人因寒食假質軍裝賭博既不勝遂謀以五鼓未
盡伺擊陌上行人弃尸河流取衣物貿易以贖所質上
曰太宗朝巡警兼用馬步卒蓋營校不同可以互相覺
舉遂復其制焉

戊申以主客員外郎直史館判三司都磨勘司楊岵監
汝州畱田務岵以重法按本司吏吏訟岵嘗私役使公
人法當奪官上特寬宥訟者決杖停職

權知開封府劉綜言貴要有交結富民爲之請求或假
記親屬奏授爵秩緣此謁見官司煩紊公政請加抑止

庚戌下詔風厲各令自新繼今復然者重寘其罪 又
詔富民得試銜官者不得與州縣官屬使臣接見如曾
應舉及衣冠之族不在此限

辛亥詔京師每冬正寒節假止許民庶賭博而禁卒有
犯官司亦例釋之甚無謂也自今不得復然
王子夔州蠻人龔才晃等來貢

癸丑進士魏剛決配崖州周惟翰勒出科場大理寺丞
魏瓘停官鄆城縣令張沔衝替剛與惟翰素有隙因誣
告惟翰詆天書按鞫無狀瓘坐延剛與惟翰於家沔卽
瓘之近親與剛等歛匿故并責焉瓘羽之子也嘗爲開
封府倉漕參軍會上元與內侍督作燈山而內侍誅索
擾人瓘密以狀聞詔杖內侍於省中

詆天書據瓘本傳
然本傳云剛詆天

書則又誤也張沔浦城人
劉敞誌墓此別一張沔也

甲寅江南路提點銀銅鉛錫胡則言信州鉛山縣開放
坑港兵卒死傷甚眾詔遣使劾轉運司規畫乖當及提
點刑獄司不卽聞奏之罪其役徒休息之則嘗爲鑄錢
監得吏所匿銅數萬斤吏懼且死則曰馬伏波哀重囚
而縱亡之吾豈重貨而輕數人之命乎籍爲羨餘釋弗
誅

乙卯建安軍鑄玉皇聖祖太祖太宗尊像成以修玉清
昭應宮使丁謂爲迎奉修宮副使李宗諤副之北作坊
使淮南江浙荆湖都大發運使李溥爲都監丙辰加溥
順州刺史旌其鎔範之勤也

戊午詔北來諸州大辟五人以上委轉運提點刑獄司

錄問訖乃得決以故頗有畱滯自今聽本處不干礙官
若三班使臣錄問環慶路走馬承受李希及言緣邊
小蕃時縱人騎抄掠熟戶上言此亦邊臣少威望所致
也因謂王旦等曰邊臣臨事多不得宜大凡若能禽驅
敵人則可決策出奇不然莫如鎮靜唯曹瑋頗有方略
嘗言蕃戎之情誠僞相半但當伺察其情實者推心厚
待之姦僞者亦善待而密爲之備彼自以爲莫我疑也
或有侵盜必掩其不虞而敗之

已未詔兩京諸路場務津渡坑冶等不得令仕宦之家
該蔭襲人主掌先是陳畱縣民田用之盧昭一爭奪酒
務用之父見任幕職昭一爲試秩故條約之

更檢
看

存此記事
始或可削

夏四月甲子三司定監買茶場官賞罰之式凡買到入算茶及租額遞年送權務交足而有羨餘者卽理爲課績其不入算者雖多不在此限

丙寅詔文武官保蔭孫姪者不得妄名爲子

己巳放瓊州螺蚌稅錢

庚午利州路承受侍禁張仲文降一資出巡外州驛遞初仲文言新知彭州皇甫載不能稱職上令本路轉運提點刑獄司察之具言載頗勤所任因命樞密院召仲文詰之具伏虛妄乃有是責詔雄霸州所調鄉丁爲忠順指揮戍于河上歲月旣久宜特遷轉之又詔補填闕額俾及元數河北忠順自太宗朝以羸英雄霸州乾甯順安保定軍家丁置凡三千人自淘河至泥姑海口